

Con Pariokia Brazil a haya su number .

Na caminda pa un exposicion sumamente intereseante y impresionante di e parokia Brazil danan 2 te 10 di september.

Antes, Brazil tawata un cunucu di mas of menos 15 bendro (bunder, ha²). E tawata conoci pa e cantidad di mata di “Brasi” cu tawata tin.



E color cora di e strea riba nos bandera, ta refleha ademas e color di nos industria di antaño di “palo di brazil”.

For di Aruba tawata exporta e palo di “Brasi” cu tawata wordo usa pa traha (of saca) tiña cora. Durante añanan 1867 a exporta alrededor di 132 ton di e Palo di Brasi. Cu tempo, a keda masha poco mata pasobra awa tawata yobe hopi, laba e tera y awo a keda skerpi so, p’esey e mata no por a sigui rende.

Na 1995 Centro di Bario Brazil a haya alrededor di 150 mata di Brasi for di Dept.Santa Rosa y a reparti esaki den e bario na tur esnan cu tawata desea y

planta esaki den nan hofi. Mata di Brasi ta caracteriza su mes pa su troncon straño.

Bo tawata sa cu siglonan pasa e Spañonan tawata yama nos isla “Isla de Brasil”debi na e gran cantidad di e mata di Brasil.

Cas Amsterdamstraat 21

Na aña 1840 sr. Manuel (Cheto)Stamper a traha su cas na Brazil pa prome biaha cu bara di mata di manglo lodia (cas di bara of cas di torto). Na 1900 a reconstrui e cas di piedra. Cu tempo a trece cierto cambionan, pero e cas a mantene su estilo di antes. E ta comparti den: hadrei di nort, e parti memei (cu sa yama cas) y e hadrei di zuid. E cushina tin un fogon. Actualmente e ta e cas mas antiguo di Brazil den bon estado. Cheto Stamper tawata conosi den Brazil pa plantamento, cortamento y procesamento di aloë. Te na ultimo ainda, por a mira e forno pa cushina e aloë; e weya grandi y e cuchara na parti zuid di e cas. Aña nobo, e mayoria grandi di grupo cu ta pasa Dande ta bai na cas di Shi Martha of Tanta Martha. E cas tawata conosi den Brazil pa ta e centro di fiesta di aña nobo, pasobra riba e fecha aki Mo Cheto ta cumpli aña tambe.

E desendientenan di famia Stamper ta masha musical. E nietonan: Leo, Rudy, Chito Stamper y Roberto Orman a funda Impacto Musical cual hunto cu Sensacion del Caribe, tawata tempo di nan tempo bandanan grandi di Brazil.



Seawise Giant a mara na reef berth na Cura Cabai

Seawise Giant tawata un Ultra Large Crude Carrier (ULCC) supertanker . E tawata e barco mas largo cu a yega di wordo traha cu un largura di 458.45 m y hanchu 68 m. E barco mas pisa cu a ser construi cu ora esaki ta yena completo ta 657,019 ton y deep den lama 24.6 m. E barco no por a pasa den e Canal di Inglatera ni den Suez Canal y ni den Panama Canal; sinembargo Seawise Giant a mara na reef berth na Cura Cabai fin di decada di aña 80. Despues e a wordo modifica y a haya diferente otro nomber. Happy Giant, Jahre Viking y Knock Nevis,



Toren di misa, Cristo Rey di Brazil

Na 1955 a funda Parokia Cristo Rey di Brazil. E ta e unico Parokia na Aruba cu tin su patrono riba e toren di e misa. Den añanan 90 lamper a kibra un man di Cristo Rey. A bahe y un cruz a bin na su luga. Fin di juni 2010 Pastor Jairo Maduro a laga pone e estatua di Cristo Rey di nobo riba e toren. A yega di pone e misa di Brazil riba un postkaart.

Celia Thiel 10 -8-2010

